

■ CONVIVENZA

In eveniment tut spezial

DA VIOLA CADRUVI*

Dacurt hai jau dumandà ina collega ch'jau n'enconusch anc betg uschè ditg sch'ella vegnia cun mai a kino. Simplamain uschia, ella possia era tscherner il film. Jau hai dentant survegnì in chanaster. «Sas, jau na dun en general betg ora daners per films», ha ella respundi. Mia emprima reacziun: Jau sun ma sentida veglia. La collega è numnadamain circa sis onns pli giuvna ch'jau. È quai ussa forsia ina chausa da generaziuns? Pertge na m'ha nagin infurmà davart questa nova moda?

Insumma m'ha ses mesadi en general vilentà. Tge tenuta è quai da betg vulair pajar per guardar in film? Èn quai ussa las consequenzas dals servetschs da streaming sco netflix e co.? Ma era là ston ins la finala pajar, era sch'il pretsch per film è tar netflix tut tenor consum natiralmain bler pli pitschen perquai ch'ins paja per mais e betg per film. Sch'ins guarda pia avunda films en in mais, lura na fai forsia betg pli surstar ch'il kino para da custar bler.

Ma ins po gea era gia daditg tadlar musica a chasa, era via servetschs da streaming, e tuttina va la gliעד anc a concerts e paja



là perfin bler dapli che per ir a kino. Natiralmain è quai schon in zichel insatge auter. Tar concerts datti per il solit ina show ch'ins na vesa betg a chasa, u almain ves'ins la performance dals musicists sin tribuna. Cler ch'ins po era guardar registraziuns d'in concert sin Youtube, ma en general è mintga concert unic. Ils musicists pon avair in bun u in nausch di e chantar e sunar tut tenor auter – almain sch'els sunan live e betg playback.

Uschia pon ins probablamain dir che mintga concert è in eveniment unic – auter ch'in film che na sa mida betg pli ina giada ch'el è taglià. El è tar mintga preschentaziun il medem. Pia stoss jau conceder che mia collega ha atgnamain raschun. Pertge duess ins pajar per ir a guardar in film sch'ins po vesair a chasa exact il medem? Forsia ch'ins al po guardar in zichel pli

baud, ma quai è cartaivlamain mo per fans fanatics propi impurtant.

Tuttina, cura ch'jau seseva lura la fin finala lezza saira persula en il kino, sfundrada en il sez lom cun la surtratga da vali cotschna ed in grond satg popcorn sin la schanuglia, hai jau stuì constatar ch'ins na va betg a kino simplamain mo per guardar in film. Igl è er in eveniment. Ins sesa en il kino, spetga fin che las reclamationes èn a fin, guarda ils trailers dals films novs e sa legra sin il film. E cura ch'il film cumenza na pon ins betg simplamain interromper el sch'ins sto spert ir sin tualetta, u far ir enavos el sch'ins ha gist guardà sin il telefonin. Ir a kino munta da vairamain sa laschar en sin in film.

Etuttenina hai jau gi in epau cumpassiu cun mia collega che seseva a chasa davant ses pitschen laptop e guardava x ina seria ch'ils algoritmus da netflix han elegi per ella. La proxima giada l'envid jau simplamain a kino. In mument spezial è numnadamain adina anc meglier sch'ins al parta cun auters.

*** Viola Cadruvi ha studegià germanistica, istorgia e rumantsch a l'Università da Turig. Mintgant lavura ella vi da sia dissertaziun e mintgant sco scolasta, ma bunamain adina scriva ella.**